

s486 (4)

FANELO YA NWINI WA MUTI TSINWE NI VA MUTI.

1. E tinsakeni hikwato ta vanhu lo mu va ha akeke hi sindyangu e mutini wu ri wunwe, ku fanele eku va ni nwini wa muti. Ha kanyingi ku ku fanele e ku ta a ri yena lo yi a pfumeleke leswaku e muti wa kona wu akiwa kwalaho. Ni nanga le yi yi nga ta va yi biye e muti wa kona yi ta fanela e ku va yi lafiwe hi yena.
2. E nwini wa muti o fanele e ku fundzha e muti wa yena hi ku wu rhandza ni ku wu nafelela le'swinene, ni ku wu lwela e ka le swi swi nga wu onhaka. Hikokwalaho o fanele e ku wu tirhela. E ku wu tirheleni ka yena o fanele e ku vona leswaku e va muti va akisana hi ku rhula. O fanele e ku vona leswaku ku nga tshuki ku va ni sinwana sa muti le si si humaka e mutini yena a nga si tivisiwanga ni leswaku a pfumela.
3. Na swona ku nga tshuki ku va ni silo le'si amukeriwaka e mutini yena a nga tivi ntshumu. Hambi va ri veni kumbe nanga ya ku ta tshungula e muvabyi kwala mutini, o fanele e ku tivisiwa. E mavabyi la wa ya humelelaka e mutini, o fanele e ku tivisiwa leswaku a va yena lo yi a lafaka e nanga. Loko e vuvabyi bya kona byi nga lafi nanga, hi yena a nga ta siya-siya e mhamba le yi ku fanelaka e ku phahliwa yona.
4. Loko ku tshuka ku va ni timholofo e mutini, e rito ra yena hi rona ri fanelaka e ku yingisiwa loko a tsema e mhaka. Loko swi endleka leswaku e mholofo ya kona yi metisiwa hi ku phahlelana e mariyeta, o fanele e ku vona leswaku yi nga ha tshuki yi twakala ku vula-vuriwa ha yona e mutini ni siku ni rinwe.
5. Na swona loko ku tshuka ku humelele e ntungu kumbe mpungu wa vuvabyi e mutini, hi yena a fanelaka e ku lafa e nanga yo tshungula e muti wa yena hikwawo. Hi yena a nga ni fanelo yo phahla e muvabyi wunwana ni wunwana wa muti, kumbe a phahla e mhamba ya muti hikwawo. Kambe e mikarhini minwana, a nga lerisa wunwana e ku endla e tifanelo leto loko yena a tsandzeka hi swinwana.
6. A swi lulamangi loko e nwini wa muti a va ni mbilu yo songela e va muti wa yena, hikuva loko kumbe va nwi dyoherile, kambe yena a nga phofuri le'swi nwi vavisaka, kumbe e mivilelo ya yena, va nga humelela hi makhombo. Kambe na swona loko a ri yena lo yi a va dyoheleke kutani a va songela, o humeleriwa hi timhango; kutani e vunwini bya  
/yena bya.....

yena bya muti a byi nga pfuni ntšhumu, byi to hušuka.

7. Na vona e va muti va fanele e ku fundzha nwini wa muti hi ku nwi endlela le'Swi nwi fanelaka, va nga nwi sori ni ku nwi sorisa e ka vanhu vanwana - hi ku nwi vengani ku nwi hleva. Va fanela e ku nwi lwela e ka la'va lafaka e ku onha e muti hi ku ringeta e ku hasa e ku hambana e ka va muti wa yena. E ku twanana loku e šikarhi ka nwini wa muti ni va muti wa yena hi kona ku endlaka e ku rhula ni lešwaku e šwikwembu šwi nga holoveri e muti lowu hi ku wu rhunela e makhombo.

8. E nwini wa muti o fanele e ku va munhu lo yi a hlawulekeke e mahanyelweni ya yena. A nga faneri ku tshinelela gandzelo loko a nga sungulangi hi ku ti-basisa yena nwini. O fanele e ku titsona hikwašwo le'Swi nga nwi lulameriki e ku ta e gandzelweni a ri na šwona. Na šwona o fanele e ku ka a nga yi ha nghohe e mitirhweni hikwayo ya yena.

9. Ku kotisa le šwi a nga yena ntsena lo yi a nga ni fanelo yo ~~ka~~ thi nelela e šwikwembu šwa muti e ku khongelela e va muti wa yena, šwa vonaka kwalaho le šwaku e fanelo ya nwini wa muti yo fana ni ya mu-prista e šikarhi ka va Yuda e mikarhini ya khale, lo yi a a fanele e ku hlawuleka e ka va nhlengeletano hikwašo e mahanyelweni ya yena. Na yena e nwini wa muti loko a endla hi muhkuva wolowo, hi kona a nga ta va nwini wa muti lo yi a fundzhekaka.

10. Na vona e va muti loko va ti karhata e ku hlayisa e muti wa vona hi ku yingisa e ku lerisa ka nwini wa muti, va ta endla lešwaku e muti wa vona wu hlayiseka ni ku fundzheka, ni valoyi a va kumi širhuva šo khokhovela ha šona e ku ta ta pfilunganya e muti.

2.

END. 486